

荔村草堂詩鈔

余旣爲叔裕前輩校刻希古堂文次及其詩亦君所手
定凡分八集集各繫年皆因事立名如楊廷秀誠齋集
例而總題曰荔村草堂詩鈔自京察外任其詩未及收
拾故集至乙酉而止攷詩家編年昉於老杜而王筠之
一官一集實已濫觴 國朝大家如朱竹垞王漁洋其
自撰詩集皆以編年標題故讀其詩則凡宦學之行藏
身世之酬酢親交之聚散睽合境遇之通塞悲愉歷歷
如繪旣足驗其人之造詣亦可攷時事之替興編詩之
法莫善於此此集仿王氏之標曰參老杜之編題一開
卷而生平若接其思古也幽以遠其書事也微以顯其

述情也婉而摯其爲景也清而奇大抵少時諸作以華
贍勝壯歲已後以蒼秀勝蓋才高學博上薄王朱而復
得江山之助故騷騷乎入少陵堂奧視誠齋之每集一
變雅俗並陳者又不可同日語矣光緒歲次壬辰十二
月廖廷相序

荔村草堂詩鈔目錄

卷一

入塾集詩一百一十九首

卷二

出門集詩一百六首

卷三

過庭集上詩一百三十首

卷四

過庭集下詩二百一首

卷五

謁京集詩一百五首

卷六

散館集詩五十五首

卷七

使蜀集上詩一百四十首

卷八

使蜀集下詩七十一首

卷九

看山集詩五十六首

卷十

儵屋集詩九十六首

荔村草堂詩鈔卷第一

南海 譚宗浚 叔裕

入塾集

起咸豐丙辰十一歲迄辛酉詩一百一十九首

擬芳樹

芳樹生中庭雜英密如霰馨烈祇自飄繁華恥輕炫似
聞東城花車馬日來徧搖落近已空早開何足羨

讀書粵秀講院

囂然市廛中有此一區宅林花摘更繁徑草踏還積牀
餘柳暉琴架富艸侯籍微聞空際喧幽砌露如滴

游靈洲山

萬里西江落奔流此暫停風生羣渚動水逼一峯青破
寺近猶在詞人應有靈徘徊談往事飛月下禪扃

擬幽州馬客吟

二首

女子須善容男兒須作健一箭落九鴈劇如探巢燕
前騎復後騎追逐似游龍相逢不道姓但說居雲中

擬前有一樽酒行

前有一樽酒主人捧觴爲客壽憶昔與君初見期容顏
絕艷如朝曦奈何離別閱數載面目枯槁成凍梨九鳥
不停飛六龍不相待人生不飲真太癡會學長鯨吸滄
海酌君酒爲君嬉泰山作平地黃河餘濁泥飛魚上陸

走弱草成喬枝偃籜老終死再世爲嬰兒斗柄指畫川
流向西是我與君離別時願君相愛長勿褻盟誓旦旦
君知之

秋夜簡友人

鳥散人事稀薄雲愛喬木涼雨歇高檐寒燈耿踈竹牀
頭有濁醪聊可慰幽獨期君攜屐來共秉西窗燭

擬春思

春風爾何來借問程幾里昨日看庭中嘉樹已紅紫徒
惱青樓人豈能歸蕩子

擬秋歌

蘇軾詩集卷一
團團瑤臺月忽落庭廡閒微霜濕成煦飛葉去不還莫
嫌北風冽應勝賀蘭山

登拱北樓

蒼茫水落炎州闊邈迤山從庾嶺收此地東南盛都會
遙臨西北有高樓層層雉堞飛檐接淦淦魚雲畫棟浮
爲問銅壺比銅狄摩挲曾閱幾春秋

擬關山月

安得閨中月關山不共隨遙知征戍客定減別離悲夢
怯鍊衣冷魂銷金管吹不如沙際雁猶有向南時

張鍊橋畫馬行

鍊橋畫馬不見畫萬騎蕭蕭來筆下憑軒意若當沙場
不知乃是丹青者一匹躡草沙上眠二匹驂驪相後先
其餘衆匹跼不前骨骼卓立尻脰圓可憐風骨森殊異
絲縹霜蹏競標綴躡躡誰知欲報恩驍騰未免常矜氣
國初東南方用兵越臺內外皆連營民房一半居旗丁
藩下廢園縱復橫雄姿齒翠匪粵產半自遼瀋兼燕京
穆也熟視求其形腕裏霹靂天房精浮雲滅沒電開闔
眼底廓廓來幽并得無作此寓感慨喜見六合初澄清
不然此馬或家畜監養當年親園牧千金高價曾不嫌
尺幅騰驤忽追逐此圖此馬皆絕倫見之座右久更新

鳴呼人閒安有此徑思跨爾馳千里去飲蒲昌海旁水
讀陳獨漉集

前生晞髮宋遺民朱鳥吟成涕泪新彭澤篇章題甲子
遺山著撰紀壬辰徵車未埒詞科輩韋布依然野老倫
莫笑應劉輕入幕當年大隱藉全身

擬塞上曲

窮廬羶帳夜迢迢月黑陰山凍未消昨夜漢庭傳驛使
紫貂惟賜霍嫖姚

擬塞下曲

無數榆關柳色新籠烟籠水遠含顰行人稍見青青喜

那識長安已暮春

擬休洗紅

休洗紅洗多紅色淺君心儻見憐顏色何嘗變昨日紅
顏今更新昨日新人今故人

和梅宛陵禽言四首

不如歸去不如歸去亂石巉巉今津梁不可渡我欲褰
裳向何處衣縑不如素客行不如住風波平地無已時
迷陽却曲君不知

子規

提壺盧酒可沽此日足可惜此酒不可無酒邊嘈嘈鳥
聲樂桃花笑春照深酌明月欲升日將落橫看天地無

酒人十二萬年亦蕭索君不見擊節悲歌行路難昨者
華堂近邱貉

提壺

婆餅焦兒不食兒不食我心惻羽毛摧落逝安適君不
見英雄失路覓食難千金一飯無顏色

山鳥

泥滑滑雨剛至獨漉十斛泥一半征人淚泥復上人衣
征人無已時

竹雞

一春雨

側側微風澹澹烟徹宵疎雨總堪憐一春況味如中酒
三月輕寒未卸縣里巷時光祈麥處山棚生計焙茶天
綠陰如幄花如霧爭遣詩人不惘然

落紅門巷記闌珊。日日陰晴稱意難。潤氣微知炊竈溼，
繁聲翻當釣篷看。江鄉春草思游子，鐙影檐花稱冷官。
愁絕天涯多舊雨，可能車馬似長安。

悄倚闌干覓句來。片雲頭上已先催。惜惜芳徑無行迹，
草草年光負酒杯。詞憶杏花虞學士，句傳梅子賀方回。
南朝四百煙中寺，多少樓臺暝不開。

喜看新綠滿亭皋。一片青山望眼勞。但有關心談稼穡，
儘多生意到蓬蒿。潮頭漲滿魚兒出，陌上塵銷馬首高。
無限綠蕪門外長，莫將顏色例青袍。

問月

二儀麗中天晦朔遞回易炎炎朱夏煊每苦日輪赫及
乎冰鏡升賞宴或終夕何哉光景同衆生異忻戚散髮
吟坡公舉杯矜太白意者團圞難物奇斯愛惜吾觀大
化中爾最稟精潔胡爲鑿天倪泛愛任所適旣窺書史
塵亦照綺羅席有時拙魄冲韜采若深匿或云桂魄淪
或謂蝦蟇蝕帝閭豈無聞胡然多幻迹矯首望蒼穹高
吟指東極

月答

大鈞運元氣寒暑無停輶十二萬年中湍駛曾靡留自
非揭光彩何以昭羣幽日中市朝滿擾擾錐刀謀羣籟

忽盡息浩然風露秋孰云古皇遠此際軒侏儻衆生混
一夢善惡誰跖由爾實蟣蝨臣稊粟居瀛洲團圓非爾
力晦蝕寧爾愁毘嵐有盡刼何預窮士憂毋以北郭餒
致作東野囚牀頭有濁酒醅馥纔新筍一醉足散慮度
與希夷遊

詠王昭君

跋涉龍庭逐虜塵漢宮回首淚霑巾畫圖尙得君王顧
差勝昭陽望幸人

擬高青邱十宮詞

越甲西來茂苑蕪荒臺走鹿闕嘯烏夷光果逐鴟夸去

親見胥濤吼怒無

吳宮

侍宴章華酒未消
銍前賭笑百嬌
燒不知行雨陽臺女

比似宮人孰細腰

楚宮

羣山能赭海能鞭
鮑臭輶車亦可憐
安用祖洲求大藥

宮中毛女却成僊

秦宮

金屋空勞貯阿嬌
長門深鎖夜迢迢
自知恩愛長捐棄

不及詞臣賦洞簫

漢宮

雀臺千丈俯清漳
佳節空勞具脯觴
七十二墳疑塚徧

定應奏伎向何方

魏宮

江左全平樂事新
却教肥白選如嬪
羊車莫怪無專寵

爲少昭陽舞燕人

晉宮

侍兒私語隱東廂指點銀屏燭兩行明日諸王應賜劍

官家今禮佛前香

齊宮

門外韓擒卷甲來賦詩未就且停催纔脩豔曲脩降表

都費江郎狎客才

陳宮

邗溝柳色廣陵花勝地端宜駐翠華不是飛龍興晉水

蕪城眞作帝王家

隋宮

梨園弟子住華清記得先王製樂名曲裏分明興廢感

霓裳聲接雨鈴聲

唐宮

擬長干行

妾心正如潮時時逐郎去郎復乘潮行須識潮來處

離明觀

城居戰塵昏野適幽趣永暫捐鞿紕煩憇此清冷境扁
舟沿近溪離立紛藻荇入門仰琳宮諸妄已手屏花濃
磎轉明竹密徑先暝移石欲近牀激池偶因井亭高臨
奔潮窗小受遠嶺窺鏡山精來嘒鐘洞猿警耽靜匪一
聞觸新備諸領斯世沉艱虞余心結孤迴遠希籬畔陶
仰止谷口鄭何當營茅茨兼復就丹鼎忘機隨鹿麋爭
鬪任蛙黽纏迴循歸涂蕭颯送清景舉杯酬山靄宿約
倘容訂

擬臨高臺

臨高臺高以崔上有無根之白日下有江流百丈湍復
迴青天如盤蕩蕩四開但覺山川雄傑處便有千愁萬
恨縈紆來臨高臺唏以悲前萬古不我期後萬年誰我
知男兒老大功業不成立行尸走肉徒爾爲聞昔之人
伯身鍾期結深契遐哉風誼今誰希驚風拂兮波浪吹
手持瑤華兮當贈誰我所思兮匪今世世悠悠兮誰我
思

感事

馳烽駱驛照扶胥火艦風船沓至初款塞願求親漢尉

閉關翻少嚇蠻書連雞未必長堪恃縛虎從來本有餘
太息徒薪誰建策竟教連結到康居

琳宮絳闕峙巍峩地擁三城瑞氣多但使綠章能詛鬼
豈煩赤羽更橫戈清談鎮靜陶公祖符呪荒唐陸法和
聞道鈴轅纔罷戰手書還注步虛歌

諸梁免胄擅威名武庫羣疑有甲兵潰敗未揮青坂卒
逡巡便棄白登城稱觴萊綵纔開醺捐玳湘纍忽遠征
自古虛聲難久據當時爭頌李元平

何曾踏伏更擒渠雜種偏令共域居深恐劫盟來贊普
慎妨弛備學哥舒虎貔儻肯隨恢復蟣蝨何難盡掃除

銅柱勒銘功不細諸公籌策定何如

避亂

跬步未離鄉出門恆百里獨乘西上船遠溯東流水殘
鐘越海潮曉日盧亭市莫怪淚如絲嘯猿隔溪起

江上望廣州

昔從城中住但見城中塵江上一迴望參差煙樹新雲
開羊石曉漲暝虎門春形勢古天險悲哉謀國人

遊大通寺

沿溪繞竹行溼翠在衣袂微聞煙際鐘知有隔村寺薜
痕多媚姿松響若哀吹靜中忘萬喧轉苦太幽邃澄心

洗垢煩顧影猶怯憐老僧如野麋碧眼炯無睡見人不
能迎亦復忘年歲猶憶門前流渟深與今異無言成坐
忘此卽西來意

擬橫江詞

橫江江前錦帆新凌波欲去暫逡巡可憐白浪如山惡
無數津亭待渡人

泊石門

頻年江國未銷烽琴劍飄零類轉蓬正是客愁孤迥甚
西風吹送石門鐘

寓和順鄉何氏園林

江曲輒成村江雲深到門帆檣津估集簫鼓社神尊族
盡宋元古風猶懷葛存戰塵飛不到小住卽桃源

端午日觀競渡

凌波壯士氣如虹盡日橫行碧浪中帆影高低衝海若
棹歌嘹唳激巴童邇來澤國猶兵氣何事鄉閭守土風
願選水犀三萬弩射潮江上掃艨艟

爲問

兵戈猶未定復此寄江干落葉下前嶺孤村生暮寒貧
疑詩卷崇病愛酒杯寬爲問秋來燕雕梁幾處完

觀田家刈穫有贈

義農豈云遠乃在田里間
瀕海日爭戰農人殊自閒
溝塍錯橫直春溜鳴潺潺
曉偕牛犢出夕共鳧鷖還
插秧課童稚雙鬢垂領斑
但祈租稅畢過此非所患
嗟余忝儒素掩卷恆閉關
不耕亦飽食對案先駢顏
爲君助饁餉聊慰筋力艱
四郊尙多壘壯士甲兵環
何當結鄰住相約除榛菅

亂定還廣州作

亂定愁難破還家甚別家
日長惟見鳥路僻罕逢花
大帥空戎幕連營尙虜笳
請纓慚乏術孤負好年華

擬劉生

劉生何爲者迺是高陽徒曾隸榆關卒能交柳市屠揮
金酬妙伎佩劒刺讒夫意氣邱山重斯人今更無

擬古別離二首

送君出都亭望望折楊柳不及楊柳枝時時入君手
君去上渝州龍頭大扁浮瞿唐不道險教妾若爲留

擬自君之出矣

自君之出矣熏爐罷不然畏見爐中影隨風何處邊

擬巫山高

巫山十二峰峰峰在煙霧我欲躋其巔瑤居杳何處嶺
交來去雲礪雜古今樹俯視大江流滔滔日東去

珠江行

時沙面爲夷酋所踞遍築洋樓約歲輸租五百兩

四座請勿誼聽唱珠江曲珠江滑膩如綺縠西濠風景
近荒涼南部烟花曾著錄屈指承平舊事傳珠湄錦石
月明天管絃夜市連朝市燈火南船又北船南方奇麗
尤爭羨毵毵耀揄威張宴華采千枝熱鳳膏錦屏百曲
裝螺甸繞河佳麗盡倡居翠箔紅樓畫不如歌罷愛催
三雅酒妝成時駕六萌車三城豪俠多年少袷服搔頭
各矜耀戲賭輸贏擲意錢細參工尺評崑調就中蠻素
數名姝占斷風流絕世無眇飾豈殊秦氏女冶游惟許
霍家奴歡樂朝朝兼暮暮急管繁絃不知處未惜量珠

博笑歡更傳解珮多奇遇一朝胡騎忽雲屯英護州前
戰鼓昏驟見移營來葉護居然饒肉到花門從古豪華
同一局不堪轉瞬悲陵谷禮佛新聞噴唄堂沿隄更築
屠蘇屋垂隄一道互河流粉壁蒼蕤萬仞浮碧海果然
成陸地青溪從此界鴻溝衰憐白草餘荒野銀漢無聲
露光瀉蛺蝶猶疑是壞襦鴛鴦未易尋香瓦道逢故老
語淒涼回首平康事暗傷銀燭三千曾列隊金釵十二
舊成行事去豈知長寂寂剩水殘山淚橫臆莫向遺踪
覓故釘只應寄恨翻長拍往日紅兒與雪兒飄零老大
半難知豪門去作監廚婢販肆今爲賣餅師風廊水榭

歸何所墮履遺簪委焦炬剩見銅鋪澀綠苔忍看羅襪
拋黃土悵望蕪城畫角遲水天閒話不勝悲垂楊火是
傷心樹一片青青似舊時

芭蕉

岸柳庭梧外秋聲爾最先秋人寒到影秋夜永如年淅
瀝難成夢蕭寥欲證禪呼僮移別院不遣近吟邊

登六榕寺塔

塔勢如涌出上與霄漢爭遠同慈恩勝突過耆闍名雷
電伏柱隱烟雨交檻輕化臺此傑構紺雨非世情山形
兩戒盡地軸重溟傾奇觀忽蒼萃顧盼殊崢嶸高秋昨

憑覽瘦日寒無晶寶輪已崩墜殘碣猶縱橫野曠倏變
色風號多慘聲人家罕炊火虜帳紛連營寶藏昔珍玉
荒原今棘荆秋燐壤井出野蔓枯骨縈借問舊臺苑廢
蹟人得耕竟同歎桑海何堪賦蕪城寄言備邊者覆轍
良可徵

擬望歸吟

塞雲蕭蕭木葉下塞上行入爭飲馬相逢漢語笑相聞
半是長城戍邊者少年十五事戎圍望斷長安不得歸
年年家裏無消息不道還家夢亦稀五更城頭吹箴策
氈帳盤盤黑如漆羽書前夜洛陽來又報征西還募卒

馬邑龍堆路幾千封侯志願更何年中原棄地知多少
却遣屯田瀚海邊

登高

滿目風煙畫角哀側身天地此登臺填胸早有千秋淚
放眼今誰一代才碧草荒荒黏野去寒雕故故逐人來
勝遊不是龍山會懶看黃花照座開

白蓮

仙姿疑認許飛瓊繫纜湖祠擬薦馨水調愛翻如夢令
情根容識洗心經招魂北渚波微上沈醉西風酒易醒
愁絕冰絃成坐擁一天涼意雨冥冥

妙偈渾疑不是花絕無雕飾絕無瑕一年心事漸幫沙
十里方塘種玉誇似此風流宜冷署脩然妝束似貧家
蓬萊水淺無消息閑煞麻姑兩鬢華

嫩涼秋水半湖烟彷彿相逢八社年悟到文章澄淡境
參來慧業色空天單衫雙鬢人如玉月地雲堦佛有緣
二十四鷗明似雪等閑飛傍拗花船

羅襪盈盈試步難頓疑碧夢隔銀灣浣紗曲擬調清管
倚袖寒多褪醉顏白雪填詞元好問瑤池侍宴魏承班
幾時卅六陂頭路挈鷺提鵲趁月還

擬日出行

日出入安窮期纔昇濛汜還崦嵫吾聞大荒之西乃有
黎邱國黑海溟瀲深不測長鯨鋸身搏人食時吐陰雲
掩天色羲和羲和汝胡不決氛翳開鴻蒙揮長劍彎神
弓使冥夜復晝陽曦再中六合清朗八荒來同扶桑爰
木壽不死彩曜永轉蓬萊宮嗚呼噫嘻吾呼籲之莫聽
今徒仰望於蒼穹

擬游子吟

關山險復險不阻游子行楊柳千萬絲游子千萬程曾
經游子淚楊柳今不生

泮塘晚步

西郊獨歸霧冥冥
茱萸未長菱筍生
幽禽避客就煙沒
黃葉打門知雨鳴
前溪後溪有竹樹
東崦西崦開柴荆
吾鄉勝游自不乏
安用陽羨籌躬耕

庚申雜述

十載潢池亂專征
幕府開徒聞擒董紹
幾見戮黃回離亂
寧天意艱難望將才
百年繁會地一炬付
秦灰藉甚蘇常郡
防兵此要疆屯營飛
騎健狎浪水犀強駐
鎮煩諸將雄豪冠一
方奈何芒屨著爭學
褚丹陽皖浙皆鄰土
轟摧勢不支無能妨
貉子翻似避鴟兒困
鬪謀原拙分援力太
疲儻令全搏免或可
馘仙芝

大帥今張燕江淮識姓名孤軍懸絕險九死殉餘生雪
繞蛟龍匣風高嫖姚旌翻教勞

聖主含襚飾哀榮

昭代真無比承平歷數朝屢聞兵擾攘尙似物豐饒課
稅增新額租庸變舊條勉哉勤餽餉百戰望兵銷
自愧籠東甚羈栖瘴海濱銜孟歌督護拂劍動句陳隱
迹虞翻賤憂時杜老新偏隅幸安謐痛飲日嬉春

大樹

鱗皮斷裂點蒼苔鐵幹虬枝拔地開得住名山真好福
不逢良匠也凡材錦衣寵錫婆留去暮雨飄零壯士哀

回首榮枯凡幾度舊依華屋總塵埃

鶴舒臺是安期生飛昇處

晨策踐修吟宿霧猶朝屯意疑神覲迤虛復靈想存幽
洞激清飈飛厓射朝暎窺竹怯陰密聆蘿占響繁交巖
枝格拒積徑葉飛奔緩步逐馴鹿肅心聞清猿仙人去
不還遺舄杳秦門結念佇幽桂負蹤懷芳蓀悠悠安公
駕渺渺丁令魂芝田縱馭返桑海今塵翻朽壤變華屋
荒榛非故原千齡有代謝已矣夫何言

入白雲寺酌九龍泉

緣厓轉微坳直上飛鳥背驟聞風玎璫驚見日破碎影

落愁急湍神悽注奔瀨淙然綠一泓演颺似離地倒涵
圓穹暉深蓄太古籟裂坤時競喧出坎或爭隘傳聞龍
宅幽禱雨表霸異海國近烽塵人民劇凋瘵珪璧罷薦
虔庭牆廢塗塹神其忍黎元縱使蛇豨噬願鳴列缺鞭
一洗八荒翳

從蒲澗上石梁登景泰寺

山行不覺疲歸翼忽陵亂稍知東峯陰遠見西日曠攀
紅捫剝厓瞰碧得深澗圓巖砰啟扉欹石截成岸泉聲
細不知雲氣冷堪盟幽音涵篠簞潤色冒葭薺振衣猶
峴陘竦體已霄漢遙見采樵人浩歌出林畔偕遊卽朋

儕何必定童冠曠賞豈吾私
沖襟實多翫舉彼青桂枝
摘芳期歲晏

夜宿能仁寺

野人愛郊眺釋子恆巖栖
去住雖各異探幽理亦齊
披叢厭迴枉援葛愁攀躋
隄陴得前庵借宿留招提
樹疎見星大泉咽知磳低
虛無竹柏肅想像猩鼯嘯
愛靜自得適聆喧彌引悽
遙睇城郭內萬家魂夢迷
境遇喻隍鹿識膠猶甕雞
誰持徑寸珠照彼垢濁泥
性繕故無妄賞存寧久睽
明朝別山去面目慙塵黧

讀史襍感

紛傳羽檄命專征，弧矢櫜槍氣未平。
校尉西園新置戍，藩王北地舊知名。
籌邊早用臧宮議，破敵何須馬援行。
聞道漢家開壽讌，大廷依舊用韶觥。

大帥威名禮數優，貂蟬原自出兜鍪。
指揮禁旅千驍騎，管領藩封五翕侯。
豈謂蒲騷空狃勝，翻令劍閣得潛收。
浪傳衛霍勳猷大，功罪分明史筆留。

璧月瓊枝劫火枯，五雲樓閣委榛蕪。
西京圖籍餘灰燼，東觀渾儀失典模。
御道卽今猶舞馬，城門終古恨啼烏。
灞橋銅狄多情甚，似此荒涼解見無。

瀋陽灤水暮雲低，龍武新軍節暫移。
故老尙瞻司隸法，

良家不乏羽林兒略同遼海唐皇駕豈比潯陽漢武馳
終是萬全承睿略六飛安穩駐戎師

平世爭談策治安金甌何忍見凋殘勤王溫嶠稀謀略
抗疏張陵慢糾彈空有聚謀矜築室終教盟約恃登壇
羽林七萃多驍勁誰信逍遙袖手看

受降依舊事羈縻孤注當年惜計非已見軍容消白旄
尙遲正殿引朱衣徙薪誰善隄防策制挺宜申撻伐威
此後補牢仍未晚好憑訓練講戎機

呂紀畫鷹歌

華堂月淨蟹螯露主人愛客陳縑素怪茲咫尺軒楹閒

何得突兀槎枿之古樹細觀勁翩翩然翻想見爐錘筆
端鑄我聞畫鷹者最數姜楚公邊昭及林良厥技頗亦
同紀也下筆相追從方其冥想動真宰意欲慘淡無天
功當年侍從南薰殿豹房日暮爭嬉宴泰彬前導朱壽
來追逐圍場若馳電偶然點筆成此圖往往深情存諫
諫不圖宮闕圖草萊寓意微茫果誰見嗟余振觸百感
生與此舊恨偏殊情鷹兮稟氣最猛鷲啄睛搯腦羣雛
驚胡爲斂伏不一試草間狐兔猶縱橫北風昨夜蕭關
起願爾決雲馳萬里一擊亂羣空再擊妖領死掃除六
合會有時莫向凡禽驚爪背吁嗟乎材官突騎今豈無

驚病局縮非壯夫鷹兮鷹兮人不如儻登劉表高臺上
我亦乘風試一呼

由花埭放船至汾江

垂柳罨亭臺烟深綠不開征人將落絮追逐渡江來對
酒欲停飲流鶯相向催韶光能幾度爛醉莫徘徊

袞袞

袞袞浮名一笑中鼠肝蟲臂競雌雄嘶風冀野輸神駿
垂翅同谿歎病鴻憂樂要關天下任文章終企古人工
眼前榮悴何須問不學昌黎送五窮

半帆亭夜坐

風颯忽早秋沈沈黯將夕延緣傍碧池恣意任所適青
天垂似檐空際露微白月華升漸高晃漾愈增色羣木
低若迎四鄰遠無隔水外多虛明烟中聚深碧徘徊感
浮生嘉賞豈屢值坐觀成暫娛將去轉遲惜寺鐘忽曙
鳴隱几聊憩息遙知清夢酣應到水晶域

秋夜雜詩

霜降百工休田家罷耕作斗酒與隻雞鄰里相酬酢亦
有龐眉翁晚歲猶矍鑠偃曝向南榮浩歌殊自樂而我
忝儒冠卒歲竟何獲高談慕皇墳學業成淺落不及石
戶農猶有百廬穫

階前木葉下徒倚南檐端明星掛樹杪奕奕蒼龍蟠中
原近俶擾黎庶殊未安遙瞻大角次兵氣猶瀰漫事往
或餘慟憂來輒長歎安知非我輩異日籌艱難勉儲根
柢學勿致譏儒酸九原如可作所慕莘與磻

中庭置羣經史集羅兩廡牙籤鱗次排一一粲堪數雖
殊祕閣藏已敵西齋簿何必羨膏粱饑腸足撐柱幸生
軒佶朝儻或守環堵請纓苦未能寧與草木伍空言託
楮毫於世或微補不見巫山村學問只論語未到荒瘠
區誰知購書苦

晨興踐階砌百草猶芬芳野花絕嬌冶時有微馨颺惜

哉乏嘉實何以羞玉堂爾來舉孝秀大半工詞章詞章
亦豈富夸豔紛琳瑯聖賢盛墳典口誦心已荒聊資科
舉用不爾高閣藏誰歟實作俑厥始由舒王植根苟不
厚終復纏風霜奈何向纖幹乃欲求棟梁

新買綠綺琴彈作履霜曲音響一何悲隨風紛斷續一
彈林壑悽再彈天地肅惜無知音人相賞慰幽獨幽獨
何足嗟世情多反覆愛才或賞譽忌善反憎辱邈爾幽
澗泉泠泠若鳴玉問誰曾聽之曠古無履躅宮商誠自
諧何必悅流俗

結交寡俗士入夢多古人褰帷獲瞻覲歡若平生親既

來驟復去倏忽馳風輪沈吟遂達曙涕淚橫霑巾世途
苦狹隘捷足爭要津何如甘憫默永作華胥民遣懷定
何物且醉羅浮春

中宵繙故書拉雜見除目姓名紛蟬聯細字如綴粟幹
濟果蕭曹文章果潘陸居然廁廟廊影纓更馳轂嗤人
還自嗤內揣先慙慙設我蝨其閒恐亦素餐辱往者顧
季鴻壇席貽謗譴亦有劉秩流談兵終敗覆毋以處草
茅哆口議鈞軸事變識忠良承平原碌碌澗松匪後凋
豈異凡草木

大道旣云邈畸士多孤高儒門苦淡泊或向緇流逃清

晨入古寺震地聞蒲牢嘈嘈噴噴鬧殷殷鐘魚號彼教
猶尙爾習勤寧憚勞奈何縫掖輩歲月甘荒惓齟康百
無用得勿慚若曹所期勉砥行誦讀安蓬蒿

憂來若無端推枕屢反側江淮久厭兵皖豫千里赤災
黎竟何辜感念淚橫臆我曹忝冠巾康濟視微力積此
悲憫心天公或憐昔身無卒歲謀乃憂四海瘠同作大
化民義當共忻戚東家有寒儒持籌訖朝夕居然足穀
翁田畝連阡陌抗談慕孔顏所志乃躋跼笑我似杞人
皇皇定何益

北風動羅幕淅淅吹人肌禁寒苦勲噓蟄伏恆經時歎

瓜復炙艾豈免求秦醫三彭竊偵伺二豎恆追隨勿爲
時運歎委頓安足悲處世忌太順履阨良亦宜微疴足
養性事過彌迫思君看坦途上亦有奔車危冥然付一
呿混混誰成虧

榮名不可期節義夙所矢仰希顏閔徒窮餓固其理道
逢西域胡俠氣傾都市貽我徑寸珠勝以千紉綺感君
眷顧情內省殊滋媿平生畏受恩冒利益深恥門前有
澄淵欲往洗雙耳君情高若雲我志皎如水

不窺呂梁壑不登太行危焉知世途上乃復藏險巖達
人不駭俗與物惟委蛇雖忘荆棘困亦慮機穽施膺滂

陷黨錮馬蔡遭纓縲通介果孰是千秋爲痛悲

驅車北邙上古墓何纍纍荒涼榛蔓際赫赫生金碑借
問誰氏塚蕘豎紛然疑撰文半卿相麗藻何紛披百年
倏俯仰已逐陵谷移朝爲碑碣用暮作階礎資丈夫志
不朽負氣爭權奇文章企游夏事業期皋伊名稱在宙
合豈仗金石垂沈碑向峴首作計何太癡豈如謝太傅
刻墓無文詞

我有青銅鏡背刻雙蟾蜍迴環鏤紫篆似是龍鸞書長
生壽無極銘語皆雅腴雕鏤豈不巧樸質非時趨邇來
洋鏡巨錦背香檀趺光芒吐盈丈照夜明如珠俗情驚

新創古制隨變渝典章遞更易況此徒區區鏡乎匪適用棄置宜座隅

園中有奇葩粲粲出西域層陰互連蜷蔽此太陽色縱蒙雨露恩偃仰殊自得吾將劇其根勿使再滋值手中無太阿咄咄徒歎息

晝蠅何翳翳暮蚊何聒聒大造多兼容乃偏育羣孽周禮禁百蟲未能非種絕彼強肆外撓我靜忘內熱不見亦不聞守之以寂滅古來制奸雄豈在矜激烈

燈前蟋蟀鳴中夜數驚起濁酒不能斟瑤琴亦罷理殯然臥匡牀靜想元化始託形宇宙閒微末若稊米本無

一物來安有朱與紫抵死競浮名細思真妄耳未得何足愁儻來吾不喜世非驪栗時獨羨巢居子

送人之津門

七十二淀水征人孤棹過雲陰連碣館大雪渡滹沱慷慨攜長劍艱難發短歌壯遊殊自慰勿復歎蹉跎

羊城新正樂府

送蠶姑

拂筦席陳蘭湯家家出戶迎蠶娘清水一盂香一炷迎得孃來願孃住朝朝合掌來孃前但願風熟如去年爾來粵地何蕭索市舶盡從吳楚泊幸賴蠶桑尙富饒不

教墟鎮全零落果然蠶造眞倍收全家溫飽何復求歲
晚魚龍陳百戲共喜蠶娘今日醉

照田禾

梯田高下光熒熒千點萬點如繁星又如燐火如飛螢
映入林薄栖鳥驚共祝今歲無蝗螟無蝗螟穀亦生含
哺鼓腹歌太平莫學前年晚禾歉縣胥頻下催糧帖

猜燈謎

紙燈數尺懸門高填街溢巷聲嘈嘈密字朦朧細如綫
中有度詞人不識一人得采千人驚明日市上傳姓名
猥巧靈敏還共稱咄哉此製洵游戲聊騁才能索新異

猶勝沿街惡句多釘鉸打油充上駟

近來詩社頗多而佳句絕少又有所

謂對聯者以尖新爲上僻澀平詭幾於不通眞風雅之魔障也

奪花礮

十步五步圍場開沿街看礮聲如雷人聲未完礮聲作
齊向礮前看礮落共傳礮彈眞有神從來中富不中貧
刀光煌煌白於雪遮道俄聞將礮奪未見臨門瑞氣迎
先教比屋仇讐結可憐爭競眞癡兒偶然勝負神豈知
有屋有田猶未贖來歲典衣作神福

近歲有因爭礮而奪殺者此陋俗不

可不禁凡得礮之家明年必演礮酬神名曰還礮豪侈必倍於舊時

書事

聞道

鑾輿返乾坤喜廓清直爲誅寶憲非是誤龐萌定讞由
中旨飛章達上京

聖明眞洞照涕淚極蒼生

憶昨遼陽駕初同扈蹕從已曾經失馬何忍幸攀龍邊
事嗟貽誤恩施濫竊封明明

家國法莫怨伏霜鋒

內帑虛糜盡珍奇供御同引池通竹籞飾殿仿椒風北
寺新成獄東園罷飾終爰書他日證罄竹恐難窮
董相今人傑彈章動九閭激揚伸士氣全活荷

君恩業正欽鵠戮應明觥觥冤豈如張敞輩遺恨歎東門

羅六湖廉訪

天池

枉顧並貽畫簞賦謝

青者五鬣七鬣黃山之古松黛者一點兩點洞庭之孤
峯中有雲氣隨飛龍卷舒奔迸如逆風其下爲長江亂
帆趁風起舟人回首望西巖似恐雨來催渡水六湖翁
乘車昔跨烏臺聰蒼山洱海幽勝窮歸來罷官但垂釣
倚闌點筆烟濛濛慧業昔爲雞足佛高情今是鹿皮公
畫圖寫此意無極想見滄洲寄胸臆他年公儻赤壁遊
我願隨爲洞簫客

荔村草堂詩鈔卷第二

南海 譚宗浚 叔裕

出門集

起同治壬戌正月迄八月詩一百六首

將之京師述懷四首

早歲蕭閑少宦情忽從遠道賦長征
趨庭慧業王文度入洛華年陸士衡
舊約敢教忘澗谷鴻文新擬仿都京
娛親自育千秋業豈但萊衣舞綵榮

一唱驪歌倍愴神吟風齧雪鍊吟身
提攜書劍須豪僕投贈錢刀感故人
此會未宜譏小草他年終恐作勞薪
聯牀差喜鴈原共側聽孤篷夜雨春

時仲兄同行

京華形勝壯燕陲大道如繩萬騎馳遠域盡通西轡貢
詞人例作北征詩交無原薛名仍貴座有荆高氣儘奇
縱使愛才逢狗監肯將詞賦漫求知

江頭話別足銷魂脈脈臨歧日又昏但指江湖期後會
相看衫袂漬啼痕田園豐歉須頻報詩卷叢殘幸代存
記取他年傳韻事鸞簫鼉鼓侑離尊

時訂於上元
後啟行

江上有懷

城南分手後未覺別離難忽聽鄰舟笛江天正暮寒窮
猿號雨雪獨雁叫風湍感此傷行役龍鐘淚冑乾

波羅江謁南海神廟

古廟森嚴肅冕旒登臨勝概壯炎州羣峯錯出東西峙
元氣中含日夜浮澤國魚鹽天下利陽侯幣玉古來憂
南方水患須隄障忍見江河日下流

厓門行

白雁一夜皋亭來潮頭如山安在哉六宮粉黛北庭去
熙明殿裏生蒿萊三閩四廣空遺語扁舟以外無尺土
不及南劉足自豪河山牛角猶終古厓門山下驅艨艟
慘慘晦雨兼愁風蒼茫天意若可挽安知不作淮淝功
臣力已窮臣合死塊肉伶俜嗟已矣可憐一片憤濤生
猶是當年趙家水傳聞柴市同孤忠賦詩三載猶從容

正如巡遠各守節死有先後咸鞠躬惜哉瀛國先降敵
受剃蕃僧亦何益倘令畢命共波濤定見河山更生色
嗚咽潮聲繞暮祠行人指點故宮基君不見辦香爭拜
宋時廟誰憶紀功元代碑

覽海

壯哉鴻濛初水力破天地陰陽積混茫萬古塞昏晦推
排成岡陵迤邐結沙汭胚渾猶未堅九土尙破碎媧爐
漸斲搏禹橈極游憩亦賴尾閭流憑之限荒裔誰歎鑿
天倪得恃舟楫濟溟渤恣橫行天吳亦驚避緬想上古
時螺舟已呈瑞幾聞猾夏蠻敢犯陶唐世脩攘貴自強

機巧何足異守險在四夷前皇有垂制

虎門

縈迴抱蛇腰曲折剖蠡腹沈沈雲霧交慘慘鬼神伏
牂千里流到此勢一束下流匯輪轉上隘極回洑號呼
愁太陰黑暗寫崖谷暄陽投不溫湛色裊腥綠傳聞海
氛時此地血漉漉誰歟撤籬藩致逞蜂蠆毒忠魂招不
還被髮騎黃鵠至今村農耕往往拾敗鏃去去勿復陳
邊事常惱人

急水門

長風急灌輸白日陷幽隱競陵喧虛空激薄泄積忿橫

吹萬靈過眇視九州窘其旁巨石橫戢戢似束筍宛延
常露腰獐劣或張吻歛然我舟至勢若被束捫迴旋鳥
翔標迅赴牛絕靱支撐畏後乘注視失前準我生亦何
爲首塗卽艱蹇歌詩空賦叩筮易恐占困豈知至人心
履險得安穩但作齊物觀悲歡兩忘混繩牀四大寬安
睡且息偃

舟中讀諸家詩各題一絕

忠愛何曾異杜公夜郎遷謫悵飛蓬白田道上聽鶯日

猶記隨班紫禁中

太白

萬卷羅胸筆有神詩成漫與見天真誰知當日低頭者

也到王楊一輩人

子美

文士遭逢末路哀頻窺東閣尙徘徊杜陵幾受嚴公詈

那有令狐解愛才

義山

命宮磨蝎果堪傷獄起烏臺甚范滂直到吳興施武子

刻詩兼亦被彈章

東坡

涪皤絕俗氣雄奇古調泠泠手自揮頻擬建除離合體

大家何苦學青衣

山谷 涪翁晚年詩多喜學六朝人音離合藥名諸體而建除體尤多

建除體者以建除滿平等字嵌於每聯之首亦鮑明遠數詩之類

萬首詩懷漆室憂冀從九世復仇讎傷心垂老仍齋恨

不見王師入蔡州

放翁

變徵哀絃不可聽兩都喬木總飄零可憐辛李先黃土

不共編摩野史亭

遺山

漢庭老吏果非誣一代詞宗氣格殊誰料末流積濫甚

爭教纖麗學廉夫

伯生

七子詩才汝獨賢龍頭應在歷城先鈴山堂圯風流歇

一任吟成樂府篇

元美

射策英年被主知晚悲宗社黍離離如何騎省歸朝後

刪盡南唐應制詩

梅村

尙書文藻劇蟬聯秋柳吟成費注箋果否勝朝桑海感

悲涼翻遶顧圭年

阮亭 顧亭林亦有秋柳詩似指前代宗藩之淪落者詞意悽婉似在阮

上翁之

吏局無端忽被彈歸來鶯脰老漁竿好名終是文人累
猶恨中朝七品官

竹垞

臨汝風流孰比肩近來彈射徧時賢詩名恰似倉山石
曾閱繁華只百年

隨園

晚眺

極目海傍烟火微荒村野堠行人稀晚潮欲上北風急
惟見海鵝相對飛

大沽

莽莽古平原連營萬帳屯海門龍氣溼沙岸馬蹏喧往

者妖氛煽於今戰壘存太平防守慎三輔此雄藩

天津

低橋橫列柳參參遠岫浮青水拭藍添著紅泥亭子小
定應風景似江南

江亭

春綠似汀洲春人靜倚樓疎狂聊白袷蕭颯類閑鷗對
此林壑遠應忘羈旅憂承平文讌地幸未散風流

訪李文正公故居

畏吾故業尙流傳夕照寒鴉古木攢提倡騷壇今古少
支持黨局去留難遺琴舊調知銷歇獵碣完文孰校刊

不獨前朝臺榭圯詩龕陳蹟亦摧殘

法梧門先生詩龕即文正故居也每

歲文正生日梧門必邀同人展拜云

豐臺

芍藥南中盛豐臺近特傳萬叢酣曉露一棱拓荒田海內兵塵滿春光

帝里妍因懷竹西路佳節尚烽烟

春盡日獨遊郊外

適野豈不快獨遊殊少陪每逢孤賞處便有百憂來覽物飛鳴遂蕭然意興哀同羣猶未易沉覓出羣才

讀朱子次劉秀野蔬食十三詩韻和作

新傳桐馬法勝味似駝酥試與吳兒說寧教茗作奴餅乳

籬根稚筍多日暮空林煮只恐酒腸寬槎朽生肺腑新筍

空門淨六根了了無一在獨有南華菰千秋味不改紫草

舊種傳楊樸新芽入饌宜莫嫌多辣性風味耐尋思子薑

茭筍迺筍名叢生向煙渚恰似荔支奴異族可同譜茭筍

嫩質穿沙透圓莖帶露柔登盤憶鄉味佳品說潮州南芥

蒔莖性最辛自有味外味髣髴高人詩咀嚼得真致蒔菜

朽質腐春餘靈芽茁雨後從知依附生託地豈能久木耳

蘿蔔昔有名擅勝紀南土思辦十雙田攜鉏劬秋雨蘿蔔

曾著土芝號多從沃野來艱難逢歉歲見汝濟時才芋魁

筍脯筠籠贈懸知
浥露乾京華塵土
地緣爾動加餐
筍豆腐始淮南奇
方閱千載酸鹹百
相宜中有真味在
豆腐白

遊天甯寺

山色寺樓下遠疑
山戴山偶尋芳草
去忽帶片雲還野
衲不識字種花惟
閉關笑余京輦客
攜酒獨能閒

清明

少年未作天涯客
寒食今朝在鳳城
忽憶故園兄弟輩
相隨一十四清明
亂墳北郭騎驢路
細雨西濠賣鬻聲
惆悵京華寥落甚
紫丁花發罨簾旌

初食鹿尾

朝來食指徐徐動想有奇珍五鼎烹喜見腥肥蒸鹿脯
不辭爛醉倒鵝觥近年秋獮稀停

蹕循例冬鮮尙貢京醉後欲聞歌敕勒綠沈弓作餓鴟
聲

黃金臺

築館當年禮上賓平齊果見霸圖新須知奇士多山澤
不羨黃金大有人

神木行

壯哉非松亦非柏槎枒崛強無顏色風霾雨蝕凡幾年

拔地蟠空尙千尺斑文剝蝕鱗白皮山鬼夜嘯神靈窺
枝條怒撐虎牙磔膏節迸注蛭脂垂傳聞定鼎燕都日
架牆搢壁開宮室舊時棄物今尙留往往螻蛇夜深蟄
木乎木乎汝亦憶惜之日朝建馭婆殿夕建明光宮般
斤爾削紛相從儻令雕刻付將作豈免斫作蟠阿龍不
然空巖長寂處木客山精竟誰侶不如棄置道傍猶得
所旣無攀枝齧葉之虎蟲又乏落角摧牙之斤斧正猶
大隱隱市朝不是山林不官府千年雨露承

聖恩

宸翰輝煌垂玉筍君不見行人肅拜無已時但覺枝柯

日日迴春姿

百感

百感無端一笑存
雞蟲牛蟻任爭喧
東方慣餓侏儒飽
北郭長貧貨殖尊
難值品才同許劭
并無愛客似桓溫
從知窮達都前定
肯向君平季主論

平生爭競恥奔車
況許承歡返敝廬
能狎漁樵良亦好
便居卿相定何如
蕭閑擬託中山酒
來往思營下澤車
我比季鷹還早達
少年歸興爲鱸魚

出都口占

津門應笑作遊非
疲馬羸僮短後衣
要與行滕添壯色

八千里路看山歸

督亢坡懷古

雁門關外追兵入，絡繹軍符如火急。
燕臺聘幣延將軍，殘祚伶俜竟何及。
圖成督亢來西行，拔劍意已無秦正。
酬恩一念自可取，豈計匕首還無成。
迴風蕭蕭吹易水，四座淋漓歌變徵。
至今此地愁雲多，萬古悲涼獨如此。
我來故里多荆榛，驅馬四顧驚黃塵。
舊時豪士倘應在，莫漫輕他屠市人。

北河鹿忠節公墓

昔傳螳臂拒

天戈誓殉孤城血染鞞千古醇儒奇節少百年朝局黨
人多宗風鹿洞還堪繼勁操椒山共不磨愧想英靈猶
未泯悲風時復下喬柯

出門二首

出門何所營短驛久乃至曉行月在峯夜行月在地霜
風淒以寒淅淅裂衣袂轅駒況病羸鞭暑不少畏奔馳
亂石中一步一顛躓不見勢家奴快馬金纏轡日昃抵
都亭解鞍已在地調笑酒家胡呼盧劇游戲男兒無錢
刀焉得不顛顚悠悠大化中我何獨濡滯

出門何所營中夜未遑息長途得少休如彼樂郊適牛

宮隔一墻蛛網懸四壁夜呼籠餅餐曉索豆漿食淚落
和酒吞酒乾淚猶滴不見乘傳郎水陸窮供億猩脣紫
駝峯一筋百金值沾飫徧輿僮餘饑尙狼籍男兒無功
名焉得不摧抑悠悠大化中我何獨寥寂

礪州

青山影裏見城樓長夏翛然景似秋十里藕花紅作霧
卧聽蟬響過礪州

鄴中客舍醉歌

不弔銅雀臺不問冰井觀漳河一片從天來只與行人
生客恨我來六月時觸熱頻西東高吟董相不遇賦銀

燭吐焰如長虹摩挲匣劍復起舞大笑曹石非英雄頗
愛陳思王置酒宴平樂亦喜徐景山埋名付杯杓眼中
二子聊可兒外此紛紜一邱貉城頭烏叫荒雞號破屋
仰視長庚高江山如此起復滅坐對不飲非吾曹琉璃
盞琥珀醪一斗十石何足豪眼前好景且盡醉身外得
失徒滔滔

渡黃河作

白日不西落黃河惟北流歡娛安有竟昏墊底須愁每
見長隄潰恆勞

聖主憂非無三策善未雨孰綢繆

過歐陽文忠公墓

宋陵聞道半荆榛
突兀窮碑此尙蹲
穆柳以還文格變
范韓而外大名尊
竝時謗議應難浼
異代風流儻尙存
安得醉翁琴操調
聊彈一曲爲招魂

鄭子產祠

下邑荒城在人傳
國氏餘治開循吏
傳名著素王書野
竹陰虛幌饑禽下
玉除干戈殊未已
撫養策何如

聞盜

蟻聚東西穴蝸爭
左右鄰竟教成巨
寇何以靖風塵擾
攘旋滋蔓艱危等
厝薪蘖芽原有自
嗟爾太平人

白刃橫行悍黃巾煽聚滋鳴狐呼健卒騎馬掠孤兒彫
劫從來困刀強實有詞不過求長吏抱鼓自應衰
憶作行襄汝防秋壁壘高鄉團喧義憤民命寄逋逃偶
獲張豐首欣焚董卓膏報功惟牧尹寵秩荷新褒
辛苦沿村路屯營列戍陳捉人移巨礮按戶斂官緡營
繕自當固搜牢休太頻分明完善地回首颯悲辛

冀州集

冀州集外行人少千峯萬壑相照曜田閒髑髏作人立
樹底悲風學鴟叫晚來城頭畫角鳴黃沙颯颯塵土驚
平生未識鄉園好零落天涯見此情

謁光武帝廟

芒碭風雲杳炎精歷數終誰能恢故業直足掃羣雄衍
派傳龍種羣才效狗功果然隨識起詎比揭竿同得勢
馳宛洛鍾祥比沛豐五銖行遽復九鼎遂仍崇南部休
嘉兆東京制度隆名儒爭侍席宿將免藏弓茲地禎祺
集當年眷顧蒙鳳遊嫺水遠龍去妣庭空想像千秋後
凋零十葉中荒庭趨野鼠斷碣仆蟬蟲竹葉虛廊曉苔
書玉珮紅冠裾陪宿衛伏臘走村翁羣盜年來煽郊原
實內訌鳴狐頻誕惑穴鼠待環攻何日櫬槍埽深期肝
嚮通神威驅石馬祕略授飛熊謁廟瞻遺範憂時鬱寸

衷春陵回望遠原樹起秋風

至南陽

臥龍山勢尙峻嶒宇宙長垂記大名我輩風塵休自歎
如公才略未歸耕

柳色

垂柳故多情江頭不斷青前身應浪子再世尙浮萍但
愛風中舞渾忘雨後零陽關三疊曲憐爾最頻聽

峴山懷孟公

峴山亭上月曾照孟公來我亦攜琴至風流安在哉經
依漁舍轉戶對鹿門開終賴詩名播明廷未棄才

漢水書所見

唱罷驪駒甫卸裝
沿隄村市更荒涼
平灘草沒都成港
絕壁花高似隔牆
有限脂膏仍權稅
無多井竈半離鄉
傷貧傷寇仍傷潦
撫卹何因得漫郎

泊宜城

我願宜城酒多於漢水
流拍浮三萬日日臥醉鄉
秋風俗似太古乾坤無旅愁
更呼伶卓問此志果同不

過仙桃鎮順風行三百餘里

微雨不肯住孤帆能送人
山風吹亂鬢山翠赴吟身
亭驛經疑數峰巒去惜頻
來船多久泊滯速各前因

泊武昌

夾江城郭儼凌虛江上青山畫不如得似故園風味否
蘄州竹筍武昌魚

漢口

塵肆雄三楚梯航匯八方紅泥京口酒碧縷海南香舊
扇狐鳴火新開蜃市場江天聊擊楫百感集茫茫

禹廟

明德千秋溯奇功八載昭隨刊資伯益協贊比神堯綠
甲靈符授黃麾遠道招休祥徵刻檢辛苦爲乘橈遂啟
元夷籙全平柳谷妖鑄金羣牧萃執玉萬邦遙祕典龍

威貯奇文鳥篆雕羽淵彌宿憾越紉衍餘苗肝蠻明禋
肅崇祠舊榜標紅鸞開寶幄丹鳳降雲輶章服仍絺繡
詞歌奏管簫提攜童稚拜颯爽鬼神朝枯柏參天鬱龍
鼉跋浪驕風雲猶北路波浪自南條祀格仍終古英靈
儻九霄江防今日要悵望意蕭寥

琴臺

伯牙操縵處遺址漢江濱絕技尙如此知音能幾人高
臺空巋立喬木不成春何況英豪輩耕屠或隱淪

洞庭湖上望君山

朝停君山纜暮聽君山鐘山色似娛我隨時爲淡濃溼

痕堆草木空氣盪魚龍彷彿聞軒樂波瀾日吼春

舟中望衡山作歌

我從洞庭入湘水挂席欲上波湯湯道傍培塿一二數
只有低邇無軒昂朝來咫尺不相讓忽放萬丈橫開張
煙霾雲走霧雨集獅蹲象伏蛟龍翔茲爲南嶽作重鎮
名勝獨絕吾能詳禹王故碑峙眞巖鄴侯舊軸餘縹緗
露壇升降兆祥瑞石廩啟閉占豐穰嗟余塵土苦跼蹐
豈暇搜討窮炎方雖然有語欲神聽腰腹誠敬焉容忘
邇來帶甲滿天地綠林小醜頻披猖浙閩南下羽書報
皖豫北去馳烽忙楚材大半爲時出平地一一爭騰驤

鍾靈毓秀或天意佇見海宇銷烽鋐八紘同風致琛賁
萬里盪滌臻平康降床潭祉永無極但祝歲稔時風暘
區區遊覽侈佳勝未免瑣屑同秕糠山靈有知似許我
船頭日送南風涼江流九轉棹歌去四望濃靄煙蒼蒼

浮湘

湘流清復清倒浸九疑青深樹一猿嘯暮煙千里冥欲
尋帝子去瑤瑟杳難聽惟見斑竹點蕭蕭風雨零

賈太傅祠

復古希隆盛憂時策治平可憐三代下獨此一儒生轉
徙投荒恨淒涼弔屈情構譏無絳灌禮樂起西京

聞猿

楚地羈栖士湘潭放逐臣
昔年多怨苦託爾代吟呻
伺客或當晝嘶鳴常及晨
窮途吾有命不爲淚沾巾

泊衡陽縣

挂席幾千里又爲湘水遊
天風吹岳影空翠滿衡州
聞有神仙窟丹砂不可求
倚簾聊擲笛叫澈楚江秋

白鷺

風標惟白鷺逐隊輒嬉馴
辛苦原求食孤高每避人
蘆花低立影楓葉穩藏身
歸計它時遂相期共隱淪

入耒陽水淨見底渟澈可愛

楚水故多態，淡然生遠姿。大都空翠溼，全在夕陽時。
野橘仙人宅，靈旗義帝祠。客愁全爲減，何事聽猿悲。

謁杜子美墓

此才終槁餓，天道竟誰陳。稷契平生事，高岑並代人。
亂離家國改，歌哭性情真。愁絕墓門道，年年芳草春。
獻賦才名在，還山志願虛。終然趨幕府，未得老樵漁。
放縱憑杯酒，飄零問諫書。幽棲寧本意，聊結草堂居。
皮几家風在，麻鞋涕淚遺。生窺豺虎窟，死誦鶴鵲詩。
歲月愁難遣，風塵困敢辭。開元羽獵盛，回首颯含悲。
耒陽卑溼縣，阻水記扁舟。楚地多哀怨，羈人善旅愁。行

蹤猶萬里詞藻動千秋采石高樓在聲名儻共儔

郴州江

看山苦愛山恆有幽栖意安得億萬身徧居名勝地我
來郴州江兩壁夾深邃晃搖無定青滄活有餘翠瀑多
時奔瀦峯雜屢向背樹藏千歲瘦竹吼四時籟問誰結
屋居伐木只蠻隸匡俗隱廬山葛洪遁海澨古也或有
然今人罕茲事田疇須墾脩井竈商位置卜鄰尙未謀
爭席已先至棄家巢雲松此計恐難遂奔馳惜去程遁
逸負高致推蓬且縱觀莫趁風帆利

江雨

秋雨似黃葉偏於江上多舟人猶夢怯羈客奈愁何阻
張蘇公詠衝泥杜老歌昔賢曾因此吾輩未蹉跎

摺嶺

平生多好奇至此屢常警猙獰千壁驕却立兩峯競遠
疑山上人已到天盡境谷底纔攀援雲端倏奔迸牽縈
樹挽腰畢完石壓頸肩指斜覆厓足跨欲崩阱沈沈白
晝寒魑魅啖人影少年意興豪自詡仗天幸感念垂堂
言泚顏發深省

宜章縣

入山山未奇別山山愈顯遙看舊來程曲折了可辨澗

隨澗側分石帶石橫轉溼痕苦霧凝皎采積陽絢欲垂
欲仰藤半活半枯蘚虛明見秋毫不復偶隱現却指東
北岑層林鬱蔥蒨悔作攜屐行未曾極遊衍山靈忽齎
然語我勿留戀大凡富貴場勞頓逐軒冕身歷無足歡
勞觀始欣羨遠看良亦佳何必定攀踐感此復解懷銜
杯百憂遣

武溪

言尋武溪水厥小如渠溝楚北及嶺外來往斯咽喉仰
翔千仞巖俯恍百丈湫我知天公意剖鑿殊有由茲山
勢負絕下瞰炎方州要令灘石悍瀦蓄爲停留不然建

瓴瀉豈免懷襄憂嗟哉彼行旅涉險徒怨尤安知昊蒼
意眷愛良獨周努力策征駕勿爲羈旅愁

舟中與諸子劇飲

山色落杯底宛如湖上煙有時花樹密窈窕愈增妍此
際陳樽酒何人不灑然醉來應有夢飛度鐵橋邊

奔瀧

水面橫石腰水底露石脊延緣一葉舟窸窣轉石隙石
來舟側移石過舟倒擲石外波撞舂石中路開闢反疑
負舟行石力非水力終年霜沫寒晴日到不得我欲移
此瀧置之海外域輪舶旣不來風塵自衰息胡爲據衝

途空復駭行役異想徒幻奇沈吟暮天黑

梅瀧

去瀧未十里早已聞湯湯奔流助輪轉始覺天地忙將
無北斗簸下灌天瓢漿不然地軸側震撼傾重洋我行
已逾月意象多慘傷路遙別恨減家近離緒長計程今
夜水應復經吾鄉願隨水共去魂夢先飛揚況聞廣州
路鐵颶頻琅璫田園果安穩結念深徬徨人生勿作客
作客愁難當不緣度瀧險涕淚先沾裳

時聞廣州七月初一颶風驟發

腰瀧

峽轉四山號山低浪反高鬼神趨穴岫日月陷波濤徑

欲回帆轉慙無擊楫豪喜瞻祠廟近展拜奠香醪

韓瀧謁韓文公祠

常羊之維古神皋厥下無底指靈輦旁襟瀛海環周遭
日月以外惟波濤明珠璣貝厥采韜棄擲未薦明堂縑
外此島嶼藏猿狖族類孔熾頤而顙獐獠狔狔獠獠
鑿穴處岫依僻褊狀貌獍醜聲嘯呶如身有蝎獸有饕
平生不識犁耒操安問俎豆兼笙鼗帝爰南顧心怛切
憫彼蚩俗成聾聵孰解除理勤芸薹汝昌黎子人中豪
讀書願學夔與咎盍往南極窮遊遨果然讒口交訾訾
謫官遂駕瀧頭舫炎天六月火繖塵下爍濁浪如沸熬

魍魎睽陽山魍嗥突出箕伯兼萍號爲颶爲颶爲颶
大聲驟發天愁慘長鯨宛延厥首驚鰐吻利若純鉤刀
惟鰕長鬣蟹巨螯大鼃背作昆侖高倏然海若騎神獫
華旂翠蓋搖颺颺掀船破艦摧檣篙沙撞石戰相擊擎
秉直邁險神豈詔要令骨幹磨堅牢潮州講學羅英髦
佻佻胄子千鵠袍或持笙磬羽籥翽肅立靜聽無設詢
誰歟遊夏誰雄褻佩瑜紉芷鏗詩騷搜梳爬剔拔其毫
升之俾逐雲霄翱亦有中道徘徊勞陡如登谷聞聲逃
稍加誘掖兼覆燾引以規墨以繩條漸別良楫分鮮莩
如羞蒹藻爲薦茅如策駑馬令攻駢道德酒醴文章膏

盡衣衣自形夏藥朝恩湔祓榮遇叨征騎歸闕行鴈鴈
女嗟士嘯吏號咷若失慈母悲瞽瞍建祠設宇徵旂陶
奔走赴役聽鳴鑿春獻脯腊秋奠醪或奉異味肅豚羔
惟公衛道堅不撓盡埽邪說芟蓬蒿邇來世變逾滔滔
昔只蜂蠆今螟螣泰西鬼教來洋艘信信聲作羣吠獒
畫樓十丈下建旄夢雲媒雨連房敖前者麇聚紛呶嘯
後者逐臭仍酖醕衆生擾擾耽荒惰若溺苦海埋坑壕
六經要義猶粕糟何啻秦火重燒糟我寧佛寺鐘唄嘈
忍見赤土成腥臊公如有神駕靈輶下埽妖孥揮豪曹
瀧江有渚山有嶧酹公一盞青蒲萄題詩出戶心嚮譟

嗟哉異教紛如毛

九成臺

曾聞虞狩遠奏樂此荒山制作先三代
聲名被百蠻如何龍去杳不見鳳飛還
冉冉臺前竹應餘淚點斑

滇江月夜

天長江復闊孤月恐無依故里幾人望
征帆今夜歸暗聞清露滴遠見小星飛
怕有潛虬聽瑤琴且罷揮

香爐峽

輕舟下溱水絕壁青叢叢巉巖忽盡處
巨浪當其衝轟騰遞百里飛駛如奔龍
其上爲巨樹柯葉交橫縱垂根

積庠豁秀萼懸青紅恭聞虞夫人玉座吹靄風婉嬋跨
紫鳳馭氣升鴻濛邇來羣盜嘯商旅時未通奈何洞壑
勝乃俾狐兔容吾思鏹疊嶂一使羣山空大書勒奇字
十丈摩青穹

英德峽

羣山忽化雲礪壑日隈積罡風旋倒吹一一矗奇石如
金青赤黃如玉紺翠碧如象鼻獅蹠如龍鱗鳳翼一入
平泉莊鉅公謬誇識遂令洽涯民歲歲應官役鐫鐫徧
空巖瘴雨不遑息華堂誰宴賓佳品列几席安知棚戶
艱血淚萬行滴陡思蘇米徒愛石苦成癖恐似蒙將軍

終當斷地脈近聞端溪坑寶氣亦寥閭擬覓鸚鵡紋一枚百金值

峽山寺

峽中無白日當晝亦常昏雨急瀑爭地峯陰雲出門忘
機飛鳥暇閱世老榕尊莫問修羅劫殘僧幾輩存

出峽

入峽殊窈深出峽始清曠是誰展拓之積氣涵莽莽茲
爲滇江流勢與牂柯抗時逢秋潦來瀕洞不相讓海旁
富沙田墟落遠彌望下流旣迫塞上勢益橫放沿江數
十鄉撐拄藉隄障深恐百年餘泛溢未可量終淪厯陽

灾或付廣陵漲念此懷抱憂臨風默惆悵

到家

到此翻疑夢登堂笑語聲倦忘更漏換喜驗燭花明次第談鄉事蒼茫話客程生還良自幸不敢厭長征

返里後仍讀書粵秀講院

秋來風物又柴荆故業仍教理短檠綠鬢未應忘遠志
青山何事急浮名新收舊管書千軸
山谷贈李輔聖詩
舊管新收幾妝鏡
短詠長謠酒數觥贏得鄰童還記憶郎君谷口誦詩聲